




# På kyrkjebakken

Redaksjonsnemnd: B. Haukanes, A. R. Hauge og B. D. Bødker



## SØNDAGSSKULENS DAG



Spente 4-åringar stimlar seg saman for å ta i mot boka si.

Den 15. september var det søndagsskulens dag, med fullsett kyrkje og veldig forventningsfulle 4-åringar som skulle få 4-års-boka si. Gudstenesta starta som vanleg med klokkeringing og song. Så kom barnekoret opp og song mange fine songar til oss. Og så var det endeleg

borna sin tur, og dei rusla spente fram til presten for å ta imot boka som dei hadde venta så lenge på. Presten las opp namna, og alle borna fekk kvar si bok som dei fornøyd satt seg ned og kikka i med ein gong. Det var morosame bilete og oppgåver i boka og mange fine songar, og dette var

vanskeleg å la vente på seg. Men talaren for dagen, Nils Arne Lavik, hadde ei kjempefin andakt der han fekk fortalt Ordet på ein fengande og morosam måte, til både store og små. Tala handla om kor viktige borna er, og at alle må bli som borna for å koma inn i Guds Rike. Han

hadde både ei dokke som hjelpte han og det var intervju av ein av disiplane på Jesu si tid om kor overraska han vart då Jesus sette borna høgare enn dei vaksne. Etter gudstenesta var det kyrkje-kaffi med kaker og frukt. Alt i alt ein fin dag i kyrkja for små og store!



Barnekoret song mange fine songar til stor glede for alle!

## GRØN KYRKJELYD

I 1996 vart det laga eit handlingsark for Grøne kyrkjelydar som kyrkjemøtet i DNK oppmoda kyrkjelydane om å bruka. I november 2007 vedtok kyrkjemøtet at det skulle setjast i gang «en tiårig bærekraftsreform for endringer i kirke og samfunn». Dette med Grøn kyrkje, vart då ein del av prosjektet «Skaperverk og bærekraft».

Me i Samnanger kyrkjelyd har i årevis brukt Fairtradekaffi, sortert boss, samarbeidd med kyrkjelyd i sør og gjort fleire «grøne» handlingar heilt utan å gjera noko vesen av det. Men no vil me gjerne registrera oss som grøn kyrkjelyd, slik at me også kan visa omverda at dette går me for!

Det me har gjort er å forplikta oss på 25 tiltak, mange av dei alt i funksjon, og melda oss på som grøn kyrkjelyd. I tillegg til å sløkkja lys, skru av pc, kopiera på begge sider av arket, kjøpa fairtrade-varer og slike praktiske ting, forpliktar me oss også på å integrera forbruk og rettferdsperspektiv i undervisning og trusopplæring og arrangera minst ei gudsteneste i året med fokus på miljø og forbruk. Det kjem også stundom til å koma miljötips på kyrkjesidene våre framover. Slik kan kyrkjelyden oppmoda alle om å verta med i kampen for å ta vare på skaparverket!

## SPREK KYRKJELYDSPEDAGOG MED HJARTE FOR SAMNANGER

**Tor Vilhelm Tysseland er nytilsett kyrkjelydspedagog i Samnanger kyrkjelyd. Han trødde sine barnesko på Landås i Bergen til han var 9 år då han flytta til Åsane saman med familien. Han har vore kyrkjetenar i Åsane dei siste åra samstundes som han har studert.**

*Kva var det som fekk deg til å søkja denne stillinga i Samnanger?*

Begge foreldra mine er frå Samnanger – mor frå Eikedalen og far frå Tysseland – så eg kjenner meg som samning. Eg føler at eg kjenner bygda godt sidan eg har vore her så mykje. I alle feriar og dei fleste helger har eg vore her, enten på Tysseland der bror min og eg budde hos tante Emma og hjelpte til på garden til onkelen vår, Vilhelm, eller i Eikedalen hos besto (Jenny Totland). I Eikedalen lærte eg å bli glad i å gå på ski for der var det langrennsløype og slalåmbakke. Eg har framleis veldig mykje kontakt med slekt og vener i Samnanger. Eg er glad i kyrkja og den bodskapen ho forkynner. Eg har lyst til å dela denne bodskapen med samningane så dei kan bli betre kjende med Jesus. Dessutan er utdanninga mi retta inn mot ei slik stilling.

*Korleis har du opplevd møtet*



*med kyrkja i Samnanger desse vekene du har vore her?*

Eg har frå før eit godt inntrykk av kyrkjelyden, så eg opplever det positivt å vera her. Eg set også pris på dei gode medarbeidarane eg har fått her, så alt ligg til rette for at eg skal trivast.

*Kva inneber denne stillinga som du har fått?*

Eg kjem til å vera mest engasjert i ungdomsarbeidet. Der er konfirmantarbeidet sentralt. Eg har møtt konfirmantane og dei er ein fin gieng. Eg gler meg til å verta betre kjent med dei! I ungdomsarbeidet er det også noko som vert kalla «Kro» ein gong i månaden. Dette er ein møteplass for unge og eldre og eg har stor tru på at dette kan verta til noko positivt for kyrkjelyden. Noko anna som kjem til å ta ein god del av tida mi dette året, er å gjera ferdig trusopplæringsplanen. Dette er noko me er pålagde frå styresmaktene og som skal utløysa midlar til trusopp-

læring for alle døypte mellom 0 og 18 år.

*Kva likar du å driva med i fritida?*

Eg er glad i å gå på ski om vinteren og om sommaren blir det mest springing og fotball. Eg er med i idrettslaget her i Samnanger og no er eg også med i styret der.

*Du bur framleis i Åsane, - korleis fungerer det for deg?*

Eg har framleis 50 % jobb som kyrkjetenar i Åsane saman med dei 50% eg har her. Det går greitt å pendla, synest eg. Og så har eg jo huset til Emma på Tysseland, så av og til overnattar eg der. Tanken på å bu fast i Samnanger er heller ikkje framand for meg.

*Har du ein visjon for arbeidet ditt i Samnanger?*

Ja, eg har eigentleg to: For det første ynskjer eg at kyrkja og truslivet skal vera ein naturleg del av livet, - at kristenarven vert ført vidare og at kristne krefter i bygda kan samlast. For det andre ynskjer eg at det kan vera ein link mellom kyrkja og andre organisasjonar, t.d. idretten. Eg har lenge vore engasjert i KRIK (Kristen idrettskontakt) og skulle gjerne sett at me hadde fått til noko slikt her i Samnanger.

## kyrkjekalenderen

### Oktober

Søn.13. kl. 18.00 - Haga  
**Storsamling**  
Liturg: Inge Aasgaard  
Tale: Hilde Aarvik

Søn.20. kl. 11.00 - Ådland  
**Gudsteneste**  
Dåp

Søn.20. kl. 19.00 - Haga  
**Miljøkonsert:**  
**”Sanger om jorden”**  
av kammerkoret Maria Vocalis  
og Knut Ariel m/ band

Tirs.22. kl. 18.00 - Haga  
**Kro**

Søn.27. kl. 11.00 - Haga  
**Gudsteneste**  
Nattverd

### November

Fre.1. kl. 19.00 - Ådland  
**Bach-konsert**  
av Prosjektkor og  
Musikklaget

Søn.3. kl. 11.00 - Ådland  
**Gudsteneste**  
Nattverd

Søn.3. kl. 18.00 - Ådland  
**Minnesamver**

Man.4. kl. 19.00 - Haga  
**Temasamling**  
v/ Steve Bruns

## frå kyrkjeboka



### Døypte

31.8.

Thea Nytveit

1.9.

Mariell Herfindal

8.9.

Linnea Nytveit

29.9.

Pernille Gjerde Mundal

29.9.

Elise Erichsen-Hovland



### Vigde

31.8.

Ketil Joakim Jørgensen og  
Annika Langeland

31.8.

Ørjan Nytveit og  
Miriam Heggernes